

六  
典  
通  
考

六典通考卷百四十五

湖西閻鎮珩輯

司天考

卜筮

易稱君子之道四卜筮其一焉卜筮者先聖王所以使人信時日敬鬼神畏法令決嫌疑定猶與也自伏羲畫八卦以象天地得神蓍而定皇策始有連山之易其卦以純艮爲首艮爲山雲氣出內于山故曰連山及黃帝重之而作歸藏其卦以純坤爲首坤爲地萬物皆藏于其中故曰歸藏中古以來世有卜官司怪主之舜將禪位于禹枚卜功臣書曰官占唯先蔽志昆命于元龜太

史公亦云三代之興各據禎祥塗山之兆從而夏啟世  
飛燕之卜順故殷興百穀之筮吉故周王豈非擇賢用  
占聖人有所不能廢者乎康成解易謂夏曰連山殷曰  
歸藏周曰周易而皇甫謐世紀則云夏因炎帝曰連山  
殷因黃帝曰歸藏易密戲爲炎帝其說與杜子春不同  
子春又言玉牀帝顓頊之牀瓦牀帝堯之牀原牀有周  
之牀蓋自上古創立卜筮至周人演三百六十爻以乾  
爲首遂兼三易三牀而用之又夏殷之世龜藏則不靈  
蓍久則不神事已輒棄去之至周室卜官乃寶藏蓍龜  
其大小先後各有所尚要其歸等耳考古祀禮有先卜  
而無先筮康成引世本巫咸作筮而先卜則未聞其入

意者出于黃帝顓頊之倫乎自禹受九疇已有卜筮貞  
悔之說又言龜從筮從言龜筮共違于人用作凶故周  
公卜三龜而武王有瘳紂爲暴虐而元龜不占休咎之  
徵豈徒然乎周禮太卜卜師小宗伯皆掌命龜而作龜  
以委卜人在士喪禮有所謂蒞卜授視者亦其事也周  
道既衰列邦各立卜官左氏傳所著占驗最繁及秦燔  
六籍惟易以下筮獲存而漢有司馬季主嚴君平之屬  
推論象數導人爲善其補益於政教頗多故時掇取一  
二著於篇且以廣異聞焉

大卜掌三卦之法一曰玉卦二曰瓦卦三曰原卦

卦者灼龜發於火其

形可占者其象似玉瓦原之聲辨是用名之其經兆之體皆  
焉上古以來作其法可用者有三原原田也

百二十其頌皆千有二百頌謂繇也三法體繇之數同其名

色又重之掌三易之法一曰連山二曰歸藏三曰周易易者

變易之數可占者也名曰連山似山出內其經卦皆八其別

皆六十有四掌三稽之法一曰致稽二曰簡稽三曰咸陟稽

人精神所寤可占者致稽言稽之所至夏后氏作焉咸皆也

陟之言得也言稽皆得則人作焉簡讀如諸戎持之持特亦

言得也殷其經運十其別九十運當為輝眠辰所掌以邦事

作龜之八命一曰征二曰象三曰與四曰謀五曰果六曰至

七曰雨八曰瘳謀謂謀議也果謂事成與不也至謂至不也

也象謂所造立也易曰以制器以八命者贊三兆三易三夢

之占以象國家之吉凶以詔救政以此入事命卜筮贊龜參

徒占其事吉則為否則止又佐明其繇之占演凡國大貞卜

其意以視國家餘事之吉凶凶則告王救其政

立君卜大封則眡高作龜

君無氣適卜可立者卜大封謂竟

高者可灼處示宗伯也大事宗伯泣卜用龜之腹骨骨近

足者其部高作龜謂以火灼之以作其兆也春灼後左夏灼

前左秋灼前

右冬灼後右

大祭事則眡高命龜凡小事泣卜國大遷大師

則貞龜正龜於凡旅陳龜凡喪事命龜

士喪禮則筮宅卜

卜師掌開龜之四兆一曰方兆二曰功兆三曰義兆四曰弓

兆

開開出其占書也經兆百二十體今分之爲四

凡卜事既

高揚火以作龜致其墨凡卜辨龜之上下左右陰陽以授命

龜者而詔相之

上仰者也下俯者也左左倪也右右倪也後

龜人掌六龜之屬各有名物天龜曰靈屬地龜曰繹屬東

龜曰果屬西龜曰雷屬南龜曰獵屬北龜曰若屬各以其方

之色與其體辨之

色謂天龜元地龜黃東龜青西龜白南龜

獵左倪雷右倪若是其體也東龜南龜長前後在陽象經也  
西龜北龜長左右在陰象緯也天龜俯地龜仰東龜前南龜  
右各從其體也凡取龜用秋時攻龜用春時各以其物入于

龜室上春釁龜祭祀先卜

先卜始用卜筮者言祭言祀尊焉世本日巫咸用筮作卜未問其人

若有祭事則奉龜以往旅亦如之喪亦如之

楚氏掌其燹

契以待卜事

士喪禮楚煇置于燹在龜東楚煇即契所用灼龜也燹謂炬其存火

凡卜以明火

熱燹遂飲其燹契以授卜師遂役之

燹讀如戈鐸之鐸謂以契柱樵火而吹之也契

既然以授卜師用作龜也役之使助之

占人掌占龜以八簪占八頌以八卦

占簪之八故以昭吉凶

以八卦占筮之八故謂八事不卜而徒筮之也其非八事則用九筮占人

亦占

凡卜簪君占體大夫占色史占墨卜人占坼

體兆象也色兆氣也

墨兆廣也坼兆瑩也體有吉凶

凡卜簪既事則覈幣以比其

命歲終則計其占之中否

既卜筮史必書其命龜之事及兆於策覈其禮神之幣而合歲焉

筮人掌三易以辨九筮之名一曰連山二曰歸藏三曰周

易九筮之名一曰巫更二曰巫咸三曰巫式四曰巫目五曰

巫易六曰巫比七曰巫祠八曰巫參九曰巫環以辨吉凶此

巫讀皆當為筮更謂筮遷都邑咸猶僉也謂筮眾心歡不也

式謂筮制作法式也目謂事以筮其要所當也易謂民眾不

與日也參謂筮御與右也環謂筮可致師不也凡國之大事

先筮而後卜筮因則止不卜上春相筮相謂更選凡國事

共筮表記天子無筮先王卜征伐出師若巡守也春秋傳諸侯

有守筮之勞天子道以筮始將出卜之道諸侯非其國不以

筮卜宅寢室入他國則不筮諸侯因國而天子不小處太廟

卜可建國之處吉則宮廟吉可知月令孟冬命太史覲龜筮占兆審卦吉

凶曲禮外事以剛日出郊為外事春秋內事以柔日凡卜



筮日旬之外曰遠某日旬之內曰近某日喪事先遠日吉事

先近日曰爲日假爾泰龜有常假爾泰筮有常命龜筮辭龜筮於吉國有

常卜筮不過三求吉不過三魯四卜筮不相襲筮不吉又卜

是讀龜筮也洪範七稽疑擇建立卜筮人乃命卜筮曰雨曰霽

曰蒙曰騁曰克此卜兆也雨者如雨其兆爲水霽者開霽爲

爲金克者交錯有相曰貞曰悔內卦爲貞外卦爲悔凡七卜五占用二

衍忒凡七雨霽蒙騁克貞悔也卜五雨霽白虎通禮三正

記曰天子蠲長一尺二寸諸侯一尺大夫八寸士六寸龜陰

故數偶也天子蓍長九尺諸侯七尺大夫五尺士三尺蓍陽

故數奇也所以先謀及卿士何先盡人事念而不能得思而

不能知然後問於蓍龜聖人獨見先睹必問蓍龜何示不自

專也或曰清微無端緒非聖人所及聖人亦疑之乾草枯骨  
眾多非一獨以蓍龜何此天地之間壽考之物故問之也龜  
之爲言久也蓍之爲言耆也久長意也不見吉凶於蓍復以  
卜何蓍者陽道多變變乃成也

儲泳祜疑曰自卜官失其守世莫有精其術者洪範所載  
曰雨曰霽曰蒙曰驛曰克而食墨不食墨之說未聞焉太  
史公分四時而定吉凶以橫正安節觀其身以胎開倪太  
觀其首足而雨蒙之說不及焉今之龜人又不過定五鄉  
動靜首足胎直而已小得大遺莫詣其奧然其說亦復有  
三焉一兆固有五鄉首甲乙而足壬癸此舉世所通用或  
以日辰爲祖而定五鄉之變如丙丁日則首起丙丁而次

戊己庚辛居戊己之中位甲乙乃居足焉十干皆然而甲乙之日乃居甲乙之正位謂古人以甲乙日爲起例而後人遂以爲定例也或又以本位爲祖而變五鄉之用如腰金之兆金位也則以甲乙爲財爻金克木也以丙丁爲官鬼火克金也木兆則以戊己鄉爲財爻庚辛鄉爲官鬼其說尤爲合理而又有一法則以五鄉之動者察其爲金木水火土之象隨本鄉而定吉凶如甲乙之鄉動而有金之象則爲官鬼有水之象則爲父母戰則不祥相生則吉所謂動者驛也戰者克也霽者食墨也蒙者不食墨也太史公以四時定吉凶其亦日辰變五鄉之義乎 沈括筆談曰古之卜者皆有繇詞周禮三兆其頌皆千有二百如鳳

鳳于飛和鳴鏘鏘間于兩社爲公室輔專之渝壤公之諭  
一薰一蕕十年尙猶有臭大橫庚庚予爲天王夏啟以光  
之類是也今此書亡矣漢人尙視其體今人雖視其體而  
專以五行爲主三代舊術莫有傳者 日知錄禮記少儀  
問卜筮曰義與志與義則可問志則否子孝臣忠義也違  
害就利志也卜筮者先王所以教人去利懷仁義也左傳  
子服惠伯曰易不可以占險猶有闕也筮雖吉未也故嚴  
君平之卜筮也與人子言依于孝與人弟言依于順與人  
臣言依于忠而高允亦有筮者當依附爻象勸以忠孝之  
論其知卜筮之旨矣

左傳懿氏卜妻敬仲其妻占之曰吉是謂鳳凰于飛和鳴鏘

繡有嬌之後將育于姜五世其昌並於正卿八世之後莫之  
與京陳厲公生敬仲其少也周史有以周易見陳侯者陳侯  
使筮之遇觀三三之否三三曰是謂觀國之光利用賓於王  
此其代陳有國乎不在此其在異國非此其身在其子孫光  
遠而自他有耀者也坤土也巽風也乾天也風爲天於土上  
山也有山之材而照之以天光於是乎居土上故曰觀國之  
光利用賓于王庭實旅百奉之以玉帛天地之美具焉故曰  
利用賓於王猶有觀焉故曰其在後乎風行而著于土故曰  
其在異國乎若在異國必姜姓也姜太嶽之後也山嶽則配  
天物莫能兩大陳衰此其昌乎及陳之初亡也陳桓子始大  
於齊其後亡也成子得政成季之將生也桓公使卜楚邱

父卜之曰男也其名曰友在公之右間於兩社爲公室輔季氏亡則魯不昌又筮之遇大有三三之乾三三曰同復於父敬於君所及生有文在其手曰友遂以命之 晉獻公欲以驪姬爲夫人卜之不吉筮之吉公曰從筮卜人曰筮短龜長不如從長且其繇曰寡之渝攘公之羶一薰一蕕十年尙猶有臭必不可弗聽 狐偃言於晉侯曰求諸侯莫如勤王使卜偃卜之曰吉遇黃帝戰於阪泉之兆公曰吾不堪也對曰周禮未改今之王古之帝也公曰筮之筮之遇大有三三之睽三三曰吉遇公用享於天子之卦戰克而王饗吉孰大焉且是卦也天爲澤以當日天子降心以逆公不亦可乎大有去睽而復亦其所也 晉趙鞅卜救鄭遇水適火占諸史趙

史墨史龜史龜曰是謂沈陽可以興兵利以伐姜不利子商  
伐齊則可救宋不吉史墨曰盈水名也子水位也名位敵不  
可干也炎帝爲火師姜姓其後也水勝火伐姜則可史趙曰  
是謂如川之滿不可游也鄭方有罪不可救也救鄭則不吉  
不知其他陽虎以周易筮之遇泰三三之需三三曰宋方吉  
不可與也微子啟帝乙之元子也宋鄭甥舅也社祿也若帝  
乙之元子歸妹而有吉祿我安得吉焉乃止

右兼言  
卜筮

獻公

卜伐驪戎史蘇占之曰勝而不吉公曰何謂也對曰遇兆挾  
以銜骨齒牙爲猾戎夏交捽交捽是交勝也臣故云且懼有  
口憮民國移心焉公不聽遂伐驪戎克之獲驪姬以歸有寵  
立以爲夫人史蘇告大夫曰夫有男戎必有女戎且其兆云

挾以銜骨齒牙爲猾我卜伐驪龜往難散以應我夫若是賊  
之兆也非吾宅也難則有之不跨其國可謂挾乎不得其君  
能銜骨乎若跨其國而得其君雖逢齒牙以猾其中其誰云  
弗從諸夏從戎非敗而何從政者不可以不戒 鄭皇耳帥  
師饋饋孫文子卜追之獻兆於定姜姜氏問繇曰兆如山陵  
有夫出征而喪其雄姜氏曰征者喪雄禦寇之利也衛人追  
之獲郊車耳 吳人伐楚陽句爲令尹卜戰不吉司馬子魚  
曰我得上流何故不吉且楚故司馬令龜我請改卜令曰魴  
也以其爲死之楚師繼之尙大克之吉戰于長岸子魚先死  
楚師繼之大敗吳師 楚右司馬子國之卜也觀瞻曰如志  
故命之及巴師至將卜師王曰寧如志何卜焉使帥師而行



敗巴師君子曰惠王知志夏書曰官占惟能蔽志昆命于元龜其是之謂乎志曰聖人不煩卜筮惠王其有焉上畢

萬筮仕於晉遇屯三三之比三三辛廖占之曰吉屯固比入吉孰大焉其必蕃昌震爲土車從馬足居之兄長之母覆之衆歸之六體不易合而能固安而能般公侯之卦也公侯之子孫必復其始 秦伯伐晉卜徒父筮之吉涉河侯車敗詰之對曰乃大吉也三敗必獲晉君其卦遇蠱三三曰千乘三去三去之餘獲其雄狐夫狐蠱必其君也蠱之貞風也其悔山也歲云秋矣我落其實而取其材所以克也實落材亡不敗何待 初晉獻公筮嫁伯姬於秦遇歸妹三三之睽三三史蘇占之曰不吉其繇曰士刲羊亦無盍也女承筐亦無貺

西鄰責言不可償也歸妹之睽猶無相也震之離亦離之  
震爲雷爲火爲嬴敗姬車說其輓火焚其旗不利行師敗於  
宗邱歸妹睽孤寇張之弧姪從其姑六年其逋逃歸其國而  
棄其家明年其死於高粱之虛及惠公在秦曰先君若從史  
蘇之占吾不及此夫韓簡侍曰龜象也筮數也物生而後有  
象象而後有滋滋而後有數先君之敗德及可數乎史蘇是  
占勿從何益 公子重耳親筮之曰尙有晉國得貞屯悔豫  
皆入也筮史占之皆曰不吉閉而不通爻無爲也司空季子  
曰吉是在易皆利建侯不有晉國以輔王室安能建侯我命  
筮曰尙有晉國筮告我曰利建侯得國之務也吉孰大焉震  
車也坎水也坤土也屯厚也豫樂也車班外內順以訓之泉

原以資之土厚而樂其實不有晉國何以當之震雷也車也  
坎勞也水也眾也車有震武也眾而順文也文武具厚之至  
也故曰屯其繇曰元亨利貞勿用有攸往利建侯主震雷長  
也故曰元眾而順嘉也故曰亨內有震雷故利貞車上水下  
必伯小事不濟壅也故曰勿用有攸往一夫之行也眾順有  
武威故曰利建侯坤母也震長男也母老子彊故曰豫其繇  
曰利建侯行師居樂出威之謂也是二者得國之卦也董  
固迎公於河公問焉吾其濟乎對曰臣筮之得泰之八曰是  
謂天地配亨小往大來今及之矣何不濟之有晉成公之  
歸也晉筮之遇乾之否曰配而不終君三出焉晉楚遇於  
鄢陵公筮之史曰吉其卦遇復三三曰南國蹙射其元王中

厥目國賊王傷不敗何待 穆姜薨於東宮始往而筮之遇  
艮之八三三史曰是謂艮之隨三三隨其出也君必速出姜  
曰亡是於周易曰隨元亨利貞无咎元體之長也亨嘉之會  
也利義之和也貞事之幹也體仁足以長人嘉德足以合禮  
利物足以和義貞固足以幹事然故不可誣也是以雖隨无  
咎今我婦人而與於亂固在下位而有不仁不可謂元不靖  
國家不可謂亨作而害身不可謂利棄位而姦不可謂貞有  
國德者隨而死咎我皆無之豈隨也哉我則取惡能無咎乎  
必死於此弗得出矣 穆子之生也莊叔以周易筮之遇明  
夷三三之謙三三以示卜楚邱曰是將行而歸爲子祀以讒  
人入其名曰牛卒以餒死明夷日也日之數十故有十時亦

當十位自王已下其二爲公其三爲卿日上其中食日爲二  
且日爲三明夷之謙明而未融其當且乎故曰爲子祝日之  
謙當鳥故曰明夷于飛明而未融故曰垂其翼象日之勳故  
曰君子于行當三在且故曰三日不食離火也艮山也離爲  
火火焚山山敗於人爲言敗言爲讒故曰有攸往主人有言  
言必讒也純離爲牛世亂讒勝勝將適離故曰其名曰牛謙  
不足飛不翔垂不峻翼不廣故曰其爲子後乎吾子亞卿也  
抑少不終

顧炎武曰連山歸藏非易也而云三易者後人因易之名  
以名之也左傳僖十五年戰于韓成十六年戰于鄆陵其  
占皆不用周易而別有引據之詞卽所云三易之法也而

傳不言易

其用周易處必出周易之名于上如

錢大昕

曰春秋之世三易尚存其以周易占一爻變則以變爻詞

占如觀之否明夷之謙歸妹之睽之類是也數爻變則以

彖詞占如艮之八貞屯悔豫皆八之類是也六爻皆不變

亦以彖詞占泰之八是也以爻辭占稱九六以彖辭占稱

八九六八之名惟周易有之若雜以它占則否千乘三去

射其元王不云蠱之八復之八者非周易繇詞也惠氏棟

嘗言之著圓而神七也卦方以智八也六爻易以直九六

也七七四十九著之數八八六十四卦之數九六變成三

百八十四爻之數神以知來智以藏往知來爲卦之未成

者藏往爲卦之已成者故不曰七而曰八春秋內外傳從

無筮得某卦之七者以七者筮之數未成也

左傳穆姜筮遇艮之八杜預注云周禮太卜掌三易雜用連山歸藏二易皆以七八爲占故言遇艮之八其說非也顧炎武釋其義謂乾坤用九用六用其變也亦有用其不變者以艮言之二爻獨變則名之六餘爻皆變而二爻不變則名之八知乾坤亦有用七用八時也故蜀人楊損之云卦畫七八爻稱九六考晉語公子筮貞屯悔豫皆八貞本卦也悔外卦也沙隨程氏曰初與四五三爻皆變二三上不變在屯爲八在豫亦八足與顧氏之說互相證明

漢高祖因秦立太卜之官隸太常卿孝文孝景因襲掌故未

邊講試雖父子賸官世世相傳其精微深妙多所遺失武帝  
博聞藝術之路數年之間太卜大集會帝攘伐四夷卜筮豫  
見表象及猛將獲勝于彼而著龜亦有力于此上尤加意賞  
賜或數千萬如邱子明之屬寵傾朝廷至以卜筮射蠱道巫  
蠱時或頗中意所不快因公行誅破族滅門者不可勝數百  
僚震恐皆曰龜策能言後事豈亦夷三族初文帝爲代王大  
臣已誅諸呂遣使迎立之王猶豫未決遂卜之兆得大橫曰  
大橫庚子爲天王夏啟以光王曰寡人固已爲王又何王  
乎卜人曰所謂天王者乃天子也遂乘六乘傳入關果立爲  
帝宣帝時行祠孝昭廟先驅旄頭劒挺墜乃向乘輿車馬驚  
於是召梁丘賀筮之不吉上乃還時任宣子章夜入廟門待



上至欲爲逆事覺伏誅上由是奇賀元帝時京房治易事梁人焦延壽其說長于災變分六十四卦更直日用事以風雨寒溫爲候各有占驗房用之尤精

葉夢得曰吾家有焦贛易林京氏易傳二書大抵皆卜筮陰陽氣候之言不復更及易道考之班固儒林傳漢初傳易大抵皆本之田何而焦贛獨得隱士之說以授京房贛嘗從孟喜問易會喜死房卽以學出孟氏其徒瞿牧白生不肯皆曰非也然孟喜雖受學田王孫至其候陰陽災變言田生死時枕喜膝獨傳喜其實妄也故梁邱賀辨以爲田生絕施讐手中時喜歸東海無此事則二氏書其源流固無所本縱焦贛書出孟氏固謬矣

焦氏易林又名大易通變凡四千九十六

卦證一卦可以變六十四卦也沙隱程迥記云南渡諸人以易林證國事多奇驗求之累年始得之皆韻語古雅頗類左氏所賦源詞或時援引古事其中亦多重複或謂卦數文共一絲不可考也

魏鍾毓與管輅共論易義輅言卜可知君生死之日毓使筮其生日如言無蹉跌毓大愕然曰君可畏也毓問輅天下當太平否輅曰方今四九天飛利見大人神武升建王道文明何憂不平毓未解輅言無幾曹爽等誅乃覺筮云吳陸抗克步關孫皓意張乃使尚廣筮并天下遇同人之願對曰吉庚子歲青蓋當入洛陽故館常有窺上國之志

晉惠懷之際河東先擾郭璞筮之投策而歎曰嗟呼黔黎將湮於異類桑梓其翦爲龍荒乎元帝初鎮建鄴王導令璞筮之遇咸之井璞曰東北郡縣有武名者當出鐸以著受命之符西南郡縣有陽名者并當沸其後晉陵武進縣人於田中

得銅鐸五枚歷陽縣中井沸經日乃止及帝爲晉王又使璞  
瑩遇豫之睽璞曰會稽當出鍾以告成功上有勒銘應在人  
家井泥中得之繇辭所謂先王以作樂崇德殷薦之上帝者  
也及帝卽位太興初會稽剡縣人果於井中得一鍾長七寸  
二分口徑四寸半上有古文奇書郭璞嘗過顏含欲爲之鑒  
含曰年在天位在人修已  
而天不與者命也守道而人不  
知者性也自有性命毋勞著龜

齊柳世隆善卜別龜甲價至一萬永明初世隆曰永明九年  
我亡亡後三年丘山崩齊亦如此季矣屏人命與籤李黨取  
筆及高齒履題簾箔旌曰永明十一年因流涕謂黨曰汝當  
見吾不見也至是年世祖果崩世隆先二年卒  
後魏爾朱榮將攻河內令劉靈助筮之靈助曰未時必剋時

已向中士眾疲怠靈助曰時將至矣榮鼓之卽便剋陷及至北中榮攻城不獲以盛暑欲還待秋涼莊帝詔靈助筮之靈助曰必破十八九間果如言孝武帝將卽位使吳遵世筮之遇否之萃曰先否後喜晉曰喜在何時遵世曰剛決柔則春末夏初也又筮遇明夷之賁曰初登于天後入于地若能敬始慎終不失法度無憂入地矣終如其言

後齊神武崩于晉陽葬有日矣擇地頻卜不吉又至一所筮遇革咸云凶趙輔和少年最在後進云革卦於天下人皆凶唯王家用之大吉革參辭云湯武革命應天順人文宣遠登車顧云以此地爲定卽義平陵也武定八年文宣在晉陽宋景業上言易稽覽圖曰鼎五月聖人君天與延年齒東北水

中庶人王高得之案東北水謂勃海也高得之明高氏得天  
下也時在三月及還并州文宣令景業筮遇乾之鼎景業曰  
乾君也天也易曰時乘六龍以御天鼎五月卦也宜以仲夏  
吉辰順天受禪

隋文中子云汾陰侯生善筮先人事而後說卦

唐太卜令掌卜筮之法以占邦家動用之事一曰龜二曰兆  
三曰易四曰式凡龜占辨龜之九類五色依四時而用之一  
曰石龜二曰泉龜三曰蔡龜四曰江龜五曰洛龜六曰海龜  
七曰河龜八曰淮龜九曰旱龜春用青靈夏用赤靈秋用白  
靈冬用黑靈四季之月用黃靈龜上圓象天下方法地甲有  
十三文以象十二月一文象閏邊土甲有二十八匡法二十

八節骨有六間法六府匡有八間法八卦文有十二柱法十二時故象天地辨萬物者矣欲知龜神骨白如銀欲知龜聖看龜千里徑正欲知龜志看龜十字分四時所灼之體而用之春灼後左足夏灼前左足秋灼前右足冬灼後右足凡兆以千里徑爲母兩翼爲外正立爲木正橫爲土內高爲金外高爲火細長芒動爲水兆有仰伏倚著落起發摧折斷動之狀而知其吉凶又視五行十二氣一日受氣二日胎三日養四日生五日沐浴六日冠帶七日臨官八日王九日老十日病十一日死十二日葬以占之凡五兆之策三十有六用三十六筭六變而成卦一變爲兆再變成卦二爲甲乙三爲丙丁四爲戊己五爲庚辛六爲壬癸其用五行相生相尅相扶

相折大抵與卦同占凡易之策四十有九用四十九算分而  
揲之其變有四一曰單爻二曰折爻三曰交爻四曰重爻凡  
十八變而成卦又視卦之八氣王相囚死胎沒休廢及飛伏  
世應而使焉凡八純之卦十六變而復初爲一變次曰二變  
三曰三變四曰四變五曰五變六曰游魂七爲外戒八爲內  
戒九爲歸魂十爲絕命十一爲血脈十二爲肌肉十三爲體  
骨十四爲棺槨十五爲冢墓凡內卦爲貞朝占用之外卦爲  
悔暮占用之凡式占辨三式之同異一曰雷公式二曰太乙  
式並禁私家畜三曰六壬式士庶通用之凡用式之法其局  
以楓木爲天棗心爲地刻十二辰下布十二辰以加占爲常  
以月將加卜時視日辰陰陽以立四課一曰日之陽二曰日

之陰三曰辰之陽四曰辰之陰四課之中察其五行取相尅者三傳爲用又辨十二將十二月神十二將以天一爲首前  
一曰騰蛇二曰朱雀三六合四勾陳五青龍後一曰天后二  
太陰三元武四太常五白獸六太空前盡於五後盡於六天  
一立中爲十二將又有十二月之神正月登明二月天魁三  
月從魁四月傳送五月小吉六月勝光七月太卜八月天閏  
九月太衝十月功曹十一月大吉十二月神后凡陰陽雜占  
吉凶悔吝其類有九決萬民之猶豫一曰嫁娶二曰生產三  
曰歷注四曰屋宅五曰祿命六曰拜官七曰祠祭八曰發病  
九曰殯葬凡歷注之用六一曰大會二曰小會三曰雜會四  
曰歲會五曰除建六曰人神凡祿命之義六一曰祿二曰命



大典通考卷百四十五

六

三曰驛馬四曰納音五曰澠河六日月之宿也皆辨其象數通其消息所以定吉凶焉凡國有祭祀則率卜正占者卜日於太廟南門之外命龜既灼而占之命龜曰假爾泰龜有常乃授卜正作龜與象占之乃告太常卿曰某日從乃微龜也先卜上旬不吉次卜中旬若卜國之大事亦如卜日之儀

後晉高祖以太原拒命廢帝來討圍之急命馬重績筮之遇同人曰天火之象乾健而離明健者君之德也明者南面而嚮之所以治天下也同人者人所同也必有同我者焉易曰戰乎乾乾西北也又曰相見乎離離南方也其同我者自北而南乎乾西北也戰而勝其九月十月之交乎是歲九月契丹助晉擊敗唐軍晉遂有天下明年張從賓反命重績筮之

遇隨曰南瞻析木木不自續虛而動之動隨其覆歲將秋矣

無能爲也七月而從賓敗

劉夔僭號呂周傑知司天監問國禘修短傑以周易筮之得比之復

曰卦有二土土數生五成於十二五相比以歲言之當五百五十災大喜賞賚甚厚夔以梁貞明三年僭號至開寶四年

國滅止五十五年蓋

係舉成數以避害耳宋至和嘉祐間蜀人費孝先傳管輅軌革卦影之術名聞天

下李璋罷郢州病臥襄陽驛舍召孝先爲作卦影先畫一鳳

止於林下有關焉又畫一鳳立于臺又畫衣紫而哭者五人

蓋襄州南數里有鳳林關傳舍名鳳臺驛時璋止二子從行

三子守官於外聞璋病甚悉來奔視至之明日璋卒臨其喪

者五人又有李某者亦善其術丞相某嘗問之卦影畫水邊

一月中有古字未幾除知湖州又盧龍團練使占卦影亦同

乃除知渭州州雖不同而其影皆符筴卜法者本楚越間  
小術自楚屈原始稱有筴筴之卜越相范蠡頗有其書當卜  
時自所向得草木枝初不計多寡左右手一縱一橫揲之以  
三而數用其劫然後一時之吉凶從違休咎福禍立可見者  
達賢君子或不道然亦有可采焉

儲泳祛疑筮易以著古法也近世以錢擲爻欲其簡便其  
錢有字者爲陰無字者爲陽故兩背爲拆二畫也兩字爲  
單一畫也朱文公以爲錢之有字者爲面無字者爲背凡  
物面屬陽背屬陰反舊法用之故建安學者悉主其說余  
嘗以木爲三彈丸丸各六面三面各刻三畫三面刻二畫  
呪而擲之以盡老少陰陽之變三丸各六面十有八變之

義也三面爲三乾之九也三面爲二坤之六也三者乾之一畫兩三也二者乾之一畫分二也三九擲之皆三則成九老陽數也三九皆二則成六老陰數也兩二一三則成七少陽數也兩三一二則成八少陰數也所用者乾坤之畫以成八卦是乾坤成六子之象也九象太極之一也三三爲乾二二爲坤象兩也三九者象三才也每九得數十五洛書皇極數也合三九四十有五河圖九宮數也上二則下三上三則下二動靜皆五故五藏於用參以四十五大衍之數五十也三九成九於上則三九伏六於下此老陽變陰之體也三九成六於上則三九伏九於下此老陰變陽之體也二三相對每九各具三五此三五以變錯綜

其數之旨也體圖而轉變動不居也六位相乘周流六虛也三九六擲而成卦亦十有八變之義也因著其法與好事者同其用

遼行軍不擇日用艾和馬糞於白羊琵琶骨上炙炙破便出不破卽不出劉璘以卜知名應曆中周兵犯燕上以敗勝問璘璘曰周姓柴也燕分火也柴入火必焚其言果驗

元太祖每征討必命耶律楚材卜帝亦自灼羊胛以相符應

遼東志扶餘國有軍事則祭天殺牛觀蹄以占解者爲凶合者爲吉

至元十一年阿爾哈雅奏

請益十萬眾渡江朝議難之帝密問田忠良曰汝試筮之濟否忠良對曰濟帝不豫召忠良謂曰或言朕今歲不嘉汝術云何忠良對曰聖體行自安矣三月帝疾愈

明初留稽疑司以掌卜筮尋罷太祖年二十四謀避兵卜於  
神去留皆不吉乃曰得毋當舉大事乎卜之吉大喜遂以聞  
三月甲戌朔入濠劉基筮三以上為天中為人下為地為老陰  
中為臣下為民以一為少陽二為少陰三為少陰四為老陰  
少陽與少陰為耦而太陽與太陰為敵得耦而說得敵而爭  
其常也或失其道而耦反為仇或得其行而敵反為用其變  
也陽多則道同而相助陰多則志異而相乖君子小人之分  
也易之取象曰車曰馬曰柁曰矢曰鬼曰狐之類提而達之  
天下之物無不該矣馬又化為龍水又以為雲變易之義也  
故曰靈棋象  
易而作也

### 占夢

漢藝文志七略雜占十八家以黃帝甘德占夢為首其  
說曰雜占者紀百家之象候善惡之證眾占非一而夢  
為大故周立其官大卜掌三夢之法其三曰咸陟者乃

周人所作而占夢自爲一官以日月星辰占六夢之吉凶詩書禮經所載高宗夢得說周文王夢帝與九齡武王伐紂夢協朕卜宣王考牧牧人有熊羆虺蛇之夢召彼故老訊之占夢左傳所書尤多孔子夢坐奠於兩楹是知古之聖賢未嘗不以夢爲大至魏晉方技猶時有之唐宋以來不復畱意於此卜雖市井妄術所在如林而無一人以占夢自名者其學殆絕矣

占夢掌其歲時觀天地之會辨陰陽之氣

其歲時今歲日時天地之會建曆

所處之日辰陰陽之氣休王前後

以日月星辰占六夢之吉凶

日月星辰謂日月星辰之行及

合辰所在春秋昭三十一年十二月辛亥朔日有食之是夜也晉趙簡子夢童子僕而轉以歌旦而日食占諸史墨對曰六年及此月也吳其入郢乎終亦弗克入郢必以庚辰日月在辰星寅午之日始有適火勝金故弗克此以日月星辰

一曰正夢

無所感動

二曰噩夢

謂驚愕而夢

三曰思夢

覺時所思

四曰寤夢

覺時道之而夢

五曰喜夢

喜悅而夢

六曰懼夢

恐懼而夢

聘王夢獻吉夢于王王拜而受之

聘問也季冬發幣而問焉若休慶之云爾因獻羣臣舍讀為釋舍萌猶釋采也萌菜始生也贈送也

之吉夢於王歸美焉

乃舍萌于四方以贈惡夢

也萌菜始生也贈送也

欲以新善去故惡

書太誓王曰朕夢協朕卜襲于休祥戎商必克

詩小雅乃寢乃興乃占我夢吉夢維何維熊維罴維虺維蛇

蛇太人占之維熊維罴男子之祥維虺維蛇女子之祥無

羊牧人乃夢眾維魚矣旒維旗矣太人占之眾維魚矣實維

豐年旒維旗矣室家濙濙衛襄公夫人姜氏無子嬖人嫫

始生孟縶孔成子夢康叔謂已立元余使羈之孫圉與史苟

相之史朝亦夢康叔謂已余將命而子苟與孔烝鉏之曾孫



周相元史朝見成子告之夢夢協嫺始生子名之曰元孟繫  
之足不長弱行孔成子以周易筮之曰元尚享衛國主其社  
稷遇屯三三又曰余尚立繫尚克嘉之遇屯三三之比三三  
以示史朝史曰元亨又何疑焉成子曰非長之謂乎對曰康  
叔名之可謂長矣孟非人也將不列於宗不可謂長且其繇  
曰利建侯嗣吉何建建非嗣也二卦皆云子其建之康叔命  
之二卦告之筮襲於夢武王所用也弗從何爲弱足者居侯  
主社稷臨祭祀奉民人事鬼神從會朝又焉得居各以所利  
不亦可乎故孔成子立靈公 衛侯占夢嬖人求酒于太叔  
僖子不得與卜人比而告公曰君有大臣在西南隅弗去慰  
害乃逐太叔遺遺奔晉衛公薨于北宮見人登昆吾之觀被

鼻北面而謀曰登此昆吾之虛縣縣生之瓜余爲渾良夫叫  
天無辜公親筮之胥彌赦占之曰不害與之邑寘之而逃奔  
宋衛侯貞卜其繇曰如魚窺尾衡流而方羊裔焉大國滅之  
將亡闔門塞竇乃自後踰 列子覺有八徵夢有六候奚謂  
八徵一曰故二曰爲三曰得四曰喪五曰哀六曰樂七曰生  
八曰死此八者徵形所接也奚謂六候一曰正夢二曰噩夢  
三曰思夢四曰寤夢五曰喜夢六曰懼夢此六者神所交也  
一體之盈虛消息皆通於天地應於物類故陰氣壯則夢涉  
大水而恐懼陽氣壯則夢涉大火而燔炳陰陽俱壯則夢生  
殺甚飽則夢與甚饑則夢取是以以浮虛爲疾者則夢揚以  
沈實爲疾者則夢溺藉帶而寢則夢蛇飛鳥銜髮則夢飛將

陰夢火將疾夢食飲酒者憂歌舞者哭故晝想夜夢神形所  
遇故神凝者想夢自消信覺不語信夢不達物化之往來者  
也 越絕書吳王夫差晝臥姑胥之臺覺寤而起其心惆悵  
如有所悔卽召太宰而占之曰向者晝臥夢入章明之宮入  
門見兩鑪炊而不蒸見兩黑犬嗥以北嗥以南見兩鐔倚吾  
宮堂見流水湯湯越吾宮牆見前園橫索生樹桐見後房鍛  
者扶挾鼓小震子爲寡人精占之吉則言吉凶則言凶太宰  
詒對曰善哉大王興師伐齊夫章明者伐齊克天下顯明也  
見兩鑪炊而不蒸者大王聖氣有餘也見兩黑犬嗥以北嗥  
以南四夷已服朝諸侯也兩鐔倚吾宮堂夾田夫也見流水  
湯湯越吾宮牆獻物已至則有餘也見前園橫索生樹桐樂

席吹巧也見後房鍛者扶挾鼓小震者宮女鼓樂也吳王大  
悅而賜太宰韜雜繒四十疋王心不已召王孫駱而告之對  
曰臣智淺無方術之事不能占大王之夢臣知有東門亭長  
越公弟子公孫聖博聞彊識通於方來之事可占大王所夢  
臣請召之吳王曰諾王孫駱移記曰告東掖門亭長公孫聖  
吳王晝臥覺寤而心中惆悵也如有所悔記到車馳詣姑胥  
之臺聖得記發而讀之伏地而泣有頃不起其妻大君接而  
起之曰何也公孫聖仰天歎曰悲哉非子之所能知也今日  
壬午時加南方命屬蒼天不可逃亡吳王腴心而言師道不  
明直諫身死無功大君曰汝彊食自愛慎勿相忘上車不願  
遂至姑胥之臺謁見吳王吳王曰寡人晝臥姑胥之臺夢云

云子爲寡人精占之吉則言吉凶則言凶公孫聖伏地有頃而起仰天歎曰悲哉夫好船者溺好騎者墮君子各以所好爲禍腴讒申者師道不明正言切諫身死無功伏地而泣者非自惜因悲大王夫章者戰不勝走倥倥明者去昭昭就冥冥見兩鋸炊而不蒸者王且不得火食見兩黑犬嗥以北嗥以南者大王身死魂魄惑也見兩鐔倚吾宮堂者越人入吳邦伐宗廟掘社稷也見流水湯湯越吾宮牆者大王宮堂虛也前園橫索生樹桐者桐爲不器詬王孫駱惶怖解冠幘肉袒而謝吳王忿聖言不祥乃使力士石番以鐵杖擊殺聖後吳王果爲越所敗且死曰以三寸之帛冥吾兩目死者有知吾慚見伍子胥公孫聖也

後漢樂安太守楊沛夢人曰八月一日曹公當至必與君杖  
飲以藥酒使周宣占之是時黃巾賊起宣對曰夫杖起弱者  
藥治人病八月一日賊必除滅至期賊果破後東平劉楨夢  
蛇生四足穴居門中使宣占之宣曰此爲國夢非君家之事  
也當殺女子而作賊者頃之女賊鄭姜遂俱夷討以蛇女子  
之祥足非蛇之所宜故也

魏文帝問周宣曰吾夢殿屋兩瓦墮地化爲雙鴛鴦此何謂  
也宣對曰後宮當有暴死者帝曰吾詐卿耳宣對曰夫夢者  
意耳苟以形言便占吉凶言未畢而黃門令奏宮人相殺無  
幾帝復問曰我昨夜夢青氣自地屬天宣對曰天下當有貴  
女子冤死是時帝已遣使賜甄后璽書聞宣言悔之遣人追

使者不及帝復問曰吾夢摩錢文欲令滅而更愈明此何謂耶宣悵然不對帝重問之宣對曰此自陛下家事雖意欲爾而太后不聽是以文欲滅而明耳時帝欲治弟植之罪偏於太后但加貶

金世祖每與敵戰嘗以夢寐卜其勝負烏春兵至蘇速海甸世祖曰予夙昔有異夢不可親戰若左軍有力戰者當克旣而與肅宗等擊之敵大敗太祖嘗往寧江夢幹帶之禾場焚頃刻而盡覺而太戚卽馳還幹帶已寢疾翼日不起幹帶伐高麗太祖臥而得夢亟起曰今日捷音必至乃爲具於毬場以待有二麋渡水而至獲之太祖曰此休徵也言未旣捷書至

論曰易稱人謀鬼謀書言格人元龜洪範稽疑先聽卿士庶人之謀而後及于卜筮蓋惟盡人之明猶豫而不能決是以就決于幽隱之鬼神而卜筮二者又不容相襲誠知人事之信而有功而鬼神之嚴而不可瀆也夫子孝臣忠天之經地之義豈待卜而後知哉君子將有行也將有爲也其受命如響豈擇其吉而趨計其凶而避哉屈原知此義故著詹尹之言曰用君之心行君之意龜策誠不能知此事又曰欲從靈氛之吉占心猶豫而狐疑蓋眾人之所謂吉乃原之所謂凶故寧舍人而從我賢哉屈子可謂知易道矣苟悅論卜筮曰德斯益否斯損吉而濟凶而救之謂益吉而恃凶而怠之謂損



橫渠張子亦云易爲君子謀不爲小人謀二子之言猶  
屈子之道也昔者穆姜得比之隨自知其必死於辱卦  
非不吉也而元亨利貞穆姜不足以稱之南蒯得坤之  
比惠伯知其不免於咎爻非不吉也而黃裳元吉南蒯  
不足以當之泰之爲卦天地氣交之卦也而占父者憂  
之父入土也歸妹之卦男女室家之別也而占母者憂  
之女之終也故觀其所占之人與其所主之事其徵應  
莫測有出乎卦爻之外者若僅僅焉挾策布卦以分陰  
陽而明吉凶是直日者巫史之小數而非通賢君子之  
達理者也

六典通考卷一百四十六

湖西閻鎮珩輯

建國考

建國通論

封建之制莫詳其所自始司馬遷黃帝本紀云神農氏  
世衰諸侯相侵伐暴虐百姓軒轅乃習用干戈討不率  
諸侯咸來賓從又置左右大監監萬國萬國利協是時  
蚩尤最爲強桀其後有其工氏而州甫甘許戲露齊許  
怡向申呂皆炎帝之子孫也並爲諸侯或分四岳焉唐  
虞建官外有州牧侯伯弼成五服至于五千東西南北  
相距五百里州十有二師外薄四海咸建五長舜封象

有庠封契于商封稷于郃皋陶之後于英六而丹朱商  
均以帝胄作賓仍其有國舊號曰唐虞閼伯虞思其後  
世也禹會諸侯于塗山執玉帛者萬國防風氏後至禹  
戮而殺之啟誅有扈仲康命允侯征羲和至太康失德  
有窮之后曰羿寔篡夏室后緡方娠逃歸有仍其遺臣  
曰靡奔于有鬲在平原鬲縣因其資力收斟灌在青州壽光縣斟尋  
在青城北海縣而滅過東萊掖縣戈宋鄭之間以復夏后氏之祀桀爲不  
道湯興師伐之葛伯韋顧昆吾皆以同黨夷滅豕韋彭  
姓也顧昆吾己姓也殷有天下制千里以爲邦畿其外  
設方伯五國以爲屬屬有長十國以爲連連有帥三十  
國以爲卒卒有正二百一十國以爲州州有伯皆用賢

侯爲之

殷之州長曰伯虞夏及周皆曰牧

八州八伯五十六正百六十

八帥三百三十六長八伯各以其屬屬于天子之老二

入分天下以爲左右曰二伯

老謂上公

天子使其大夫爲三

監監于方伯之國國三人

佐方伯領諸侯

其處畿內凡九十三

國而公卿大夫之閒田在焉湯之威德旣盛諸侯率從

四夷賓服故詩曰自彼氐羌莫敢不來享莫敢不來王

及于高宗鬼方不靖勞師三年商頌所云撻彼荆蠻者

是也至帝乙時周王季以大功九命作伯賜以圭瓚

文王因之得專征伐焉旣而化澤四洽六州歸心陝以

東周公主之陝以西召公主之亦號曰二伯武王觀兵

孟津八百諸侯不期而會旣克商于牧野大封帝王之

後列爵惟五分土惟三公侯皆方百里伯七十里子男  
五十里不能五十里附于諸侯曰附庸或謂大國五百  
里其次四百里最小者百里考于周禮王制及孟子說  
皆不合唐柳宗元曰封建非聖人意也勢也蓋諸侯歸  
殷者三千資以黜夏湯不得而廢歸周者八百資以勝  
殷武王不得而易夫聖人以公天下爲心曷嘗私其力  
于一已而獨崇吾之所親愛者哉自秦易侯王置守宰  
論者咸謂古今異宜封建不可復行矣然如宗元之說  
則是以聖人爲徇俗而遂其私非所謂公其爵賞于天  
下者也作建國考

大司馬以九畿之籍施邦國之政職方千里曰國畿其外方

五百里曰侯畿又其外方五百里曰甸畿又其外方五百里

曰男畿又其外方五百里曰采畿又其外方五百里曰衛畿

又其外方五百里曰蠻畿又其外方五百里曰夷畿又其外

方五百里曰鎮畿又其外方五百里曰蕃畿

畿猶限也自王城以外五千里

爲界有分限者九籍其禮差之書也政職所共王政之職謂賦稅也

職方氏乃辨九服之邦

國方千里曰王畿其外方五百里曰侯服又其外方五百里

曰甸服又其外方五百里曰男服又其外方五百里曰采服

又其外方五百里曰衛服又其外方五百里曰蠻服又其外

方五百里曰夷服又其外方五百里曰鎮服又其外五百里

曰藩服

服服事天子也

大行人邦畿方千里其外方五百里謂之

侯服又其外方五百里謂之甸服又其外方五百里謂之男

服又其外方五百里謂之采服又其外方五百里謂之衛服  
又其外方五百里謂之要服要服蠻服也此六服去王城九  
三千五百里相距七千里州之外謂之蕃國夷服鎮服  
蕃服也祭公謀父曰先王之制邦內  
甸服邦外侯服侯衛賓服蠻夷要服戎狄荒服甸服者祭侯  
服者祀賓服者享要服者貢荒服者王日祭月祀時享歲貢  
終王

右畿服之制 唐仲友曰堯命治水弼成五服自王畿至  
荒服各二千五百里九州之境方五千里爲方千里者二  
十五九州之外東漸西被朔南暨聲教者不在五服之內  
學者惑於五百里之說謂周公斤大封域九州之界方七  
千里非也又謂夷鎮皆在九州外亦非也或謂周公之境

廣於禹貢五百里雖稍異於鄭氏亦未盡知禹貢也周官  
既言六服又言五服祭公謀父不言九服而言五服蓋九  
服五服一也自禹貢一面言之率五百里爲限周禮以二  
而言之率以二百五十里爲限則自鎮畿而內二畿而當  
一服與弼成五服至於五千無纖毫牴牾者惟藩畿在九  
州之外卽所謂東漸西被朔南暨聲教者也周官以二百  
五十里率之亦非地域止於此也夷鎮尙在九州之內以  
其荒服使之終王各摯所寶同於蕃國行人之言與周官  
六服合不謂夷鎮卽在九州之外也然則商制如何曰詩  
頌曰邦畿千里維民所止肇域彼四海自邦畿至四海知  
其與禹貢周禮同制又曰莫敢不來享莫敢不來王知其



與祭公之言合也況作康誥之初周禮未制已言侯甸男  
邦采衛則周因商禮可知然則王制言四海之內九州州  
方千里四海之內斷長補短方三千里說者謂商之制有  
諸乎曰春秋而降四夷交侵中國境土褊矣漢文帝令博  
士采六經而作王制特據當時所見境土言之豈商制哉  
方五千里爲方千里者二十五由堯迄周無異制也

大司徒凡建邦國以土圭土其地而制其域諸公之地封疆  
方五百里其食者半諸侯之地封疆方四百里其食者參之  
一諸伯之地封建方三百里其食者參之一諸子之地封疆  
方二百里其食者四之一諸男之地封疆方百里其食者四  
之一

土其地猶言度其地其食者半公所食租稅得其  
一半耳其半皆附庸小國也屬天子參之一者亦然

職

方百里邦國千里封公以方五百里則四公方四百里則六

侯方三百里則七伯方二百里則二十五子方百里則百男

以周知天下以此率徧知四海九州邦國多少之數也方千

之得十一有奇云七伯者字之誤也周九州之界方七千里

七七四十九方千里者四十九其一為畿內餘四十八八州

各有千里者六周公變殷湯之制雖小國地皆方百里是每

事言則者設法也設法者以待有功而大其封一州之中以

其千里封公則可四又以其千里封侯則可六又以其千里

封伯則可十一又以其千里封則可二十五又以其千里則

可百公侯伯子男亦不過是也州二百一十國以男備其數

焉其餘以為附庸四海之封黜陟之功亦如之雖有大國爵

稱子而已王制凡四海之內九州州方千里州建百里之國三

十七十里之國六十五十里之國百有二十凡二百一十國

名山澤不以封其餘以為附庸間田八州州二百一十國

大國三十十三公也次國六十十六卿也小國百二十二十

二小卿也此大界方三千里三三而九方千里者九也其一

為縣內餘八各立凡九州千七百七十三國天子之元士

侯之附庸不與禹承堯舜要服之內地方七千里夏末諸

三千里之界亦分為九州而建此千七百七十三國焉周公

復其侯之舊域要服之內方七千里而因殷諸侯之數廣其

土其方千里者為方百里者百封方百里者三十國其

餘方百里者七十又封方七十里者六十為方百里者二十

九方十里者四十其餘方百里者四十方十里者六十又封

方五十里者百二十為方百里者三十其餘方百里者十方

十里者六十名山大澤不以封其餘附庸閒田諸侯之有功

者取於閒田以祿之其有削地者歸之閒田天子之縣內方

千里者為方百里者百封方百里者九其餘方百里者九十

一又封方七十里者二十一為方百里者十方十里者二十

九其餘方百里者八十方十里者七十一又封方五十里者

六十三爲方百里者十五方十里者七十五其餘方百里者

六十四方十里者九十六子產曰昔天子之地一圻方千里

列國一同方百里自是以衰衰差降今大國多數圻矣孟子曰

天子之地方千里不千里不足以待諸侯諸侯之地方百里

不百里不足以守宗廟之典籍待諸侯謂待其朝覲聘問之禮宗廟典籍祭祀會同之常

制也周公之封於魯爲方百里也地非不足而儉於百里太公

之封於齊也亦爲方百里也地非不足也而儉於百里

右分封之制白虎通王者封諸侯何重民之至也善惡

比而易知故擇賢而封之使治其民以著其德極其才上

以尊天子備藩輔下以子養百姓施行其道開賢者之路

謙不自尊故列土封賢因而象之象賢重民也諸侯封不  
過百里象雷震百里所潤雨同也七十里五十里差功德  
也天子所治方千里此平土三千并數邑居山川五十里  
名山大澤不以封者與百姓其之不使一國獨專也山木  
之饒水泉之利千里相通所均有無贍其不足制土三等  
何因土地有高下中王者卽位先封賢者憂人之急也故  
列土爲疆非爲諸侯張官設府非爲卿大夫皆爲民也天  
下太平乃封親屬者示不私也既不私封之何普天之下  
莫非王土率土之濱莫非王臣海內之眾已盡得使之不  
忍使親屬無不足之居一人使封之親親之義也

典瑞士圭封國則以地

封諸侯以土圭度日景觀分寸長短以制其域所封也

土方

氏掌三塗之法以土相宅而建邦國

知東西南北之深而相其可居者宅居也

小司徒凡建邦國立其社稷正其畿疆之封

畿九

封人凡

封國設其社稷之壇封其四疆

封國建諸侯立其國之封

量人掌建國

之法營國城郭營后宮量市朝道巷門渠

立國有舊法式若匠人職云

大宗伯王大封則先告后土

后土土神也黎所食

大祝建邦國先告

后土用牲幣

司凡筵凡封國命諸侯王位設黼依依前南

鄉設筵筵紛純加纁席畫純加次席黼純左右玉几

斧謂之

白黑采以絳帛爲質依其制如屏風然於依前爲王設席左有有几優至尊也紛如綬有文而狹者纁席削蒲蒻展之編以五采若今合歡矣畫謂雲氣也次席桃枝席有次列成文

巾車金路鉤樊纓九就建

旂同姓以封象路朱樊纓七就建大赤異姓以封革路龍

勒條纓五就建大白以封四衛木路前樊鵠纓建大麾以封

舊國同姓以封謂王子母弟率以功德出封雖爲侯伯其盡

力而已異姓王甥舅四衛四方諸侯罪隸凡封國若家牛

助爲牽傍牛助國以牛助轉徙也罪隸逸周書諸侯受命

於周乃建大社於周中其壝東青土南赤土西白土北驪土

中央疊以黃土將建諸侯鑿取方一面之土苞以黃土苴以

白茅以爲土封故曰受則土於周室其方謂建東方諸侯以

之以爲社也衛子魚曰武王克商成王定之選建明德以藩屏

周故周公相王室以尹天下也尹正於周爲睦分魯公以大路

大旂魯公伯禽也此大路金殷民六族條氏徐氏蕭氏索氏

長勺尾勺氏使帥其宗氏輯其分族將其醜類醜類以法則

周公用卽命于周使六族就周受是使之職事于魯以昭周

公之明德分之土田陪敦

陪增也敦厚也

祝宗卜史備物典策

典策春秋

制官司彝器因商奄之民

商奄國名與四國流言或逆散在魯皆令即屬魯懷柔之

命以

伯禽而封於少皞之墟

少皞墟曲阜在魯城內

分康叔以大路少皞緒

茂旃旌

少皞雜帛也緒茂大赤取染草名也

大呂

鐘名殷民七族陶氏施氏繁氏

錡氏樊氏饑氏終葵氏封畛土略自武父以南及國田之北

境

畛塗所徑也畧界也武父衛北界圃田鄭藪名取於有閭之土以共王職

有閭衛所受朝

宿邑蓋近京畿

取於相土之東都以會王之東蒐

爲湯沐邑王東巡守以助祭泰山

冊季受土

冊季陶叔受民

陶叔司徒

命以康誥而封於殷虛

殷虛

皆啟以商政疆以周索分唐叔以大路密須之鼓

密須國名闕羣

如沃鍾名

懷姓九宗職官五正

懷姓唐之餘民九宗一姓爲九族

命以唐誥

而封於夏虛

夏虛大夏今晉陽

啟以夏政疆以戎索三者皆叔也而



有令德故昭之以分物 肅慎氏貢楛矢石磐其長尺有咫

肅慎北夷之國楛木名磐石爲之八寸曰咫先王欲昭其令德之致遠也以示

後人使永監焉故銘其楛曰肅慎氏之貢矢刻曰銘楛以分

大姬配胡虞公而封諸陳大姬武王元女胡公舜後虞遏父之子胡滿也古者分同

姓以珍玉展親也展重也分異姓以遠方之職貢使無忘服也

故分陳以肅慎氏之貢

右封國之禮 白虎通王者存二王之後何也所以尊

先王通天下之三統也明天下非一家之有謹敬謙讓

之至也故封之百里使得服其正色用其禮樂永事先

祖詩曰厥作裸將常服黼嘒言微子服殷之冠助祭於

周也

周初國名

唐虞夏舉微盧彭濮八國皆蠻夷戎狄屬文王者武王伐商  
俱以師至牧野羗在西蜀舉微在巴蜀盧彭在西北庸濮在  
江漢之間 巢股之臣巢伯南方之遠國武王克商乃來朝  
芮伯作旅巢命 奄東方淮夷之種武王崩與三監武庚叛  
周周公討而滅之遷其君於蒲姑 樂記武王克殷反商未  
及下車而封黃帝之後于酃封帝堯之後于祝封舜之後于  
陳下車而封夏后氏之後于杞投殷之後於宋 昔周公弔

三叔之不咸故封建親戚以藩屏周管蔡郕霍魯衛毛聃郅

召曹滕畢原鄧郇文之昭也

管國在滎陽京縣東北雍國在河內山陽縣西畢國在長安縣

西北鄧國在始平鄧縣東

邠晉應韓武之穆也

應國在襄陽城父縣西韓國在河東郡界河內野王

縣西北凡蔣邢茅胙祭周公之胤也蔣在弋陽期思縣高平昌邑縣西有茅胙東郡

有邢城

畢公高文王子成王時爲司馬及康王立率東方

諸侯見王王命畢公保釐東郊作畢命畢在長安縣西北其

後畢萬彤伯姒姓成王時爲宗伯密康公姬姓共王

游于涇上康公從有三女犇之康公不獻于王一年王滅密

邶鄘武王克商三分其地自紂而北謂之邶南謂之鄘東

謂之衛初以處三監討滅乃封康叔于衛而以邶鄘封

同姓之國後爲衛所并檜姁姓高辛火正祝融之後武王

封之爲檜子國在禹貢豫州外方之北榮波之南居溱洧之

間幽王時爲鄭桓公所滅榮厲王時榮夷公爲卿士好專

利諸侯不享王流於彘甫侯姜姓與申皆太岳之後穆王

時甫侯作呂刑 樊侯仲山甫宣王時爲卿士 韓姬姓武王之穆後爲晉所滅其地在同州 黎姓未詳侯爵國在上黨壺關縣後黎侯爲狄人所逐棄國寄於衛衛處以中露泥中二邑

### 春秋列國

武王克商光有天下兄弟之國十有五人姬姓之國四十人爵五品而別三等公侯百里伯七十里子男五十里不滿者爲附庸蓋二千八百國周衰轉相吞滅列國耗盡春秋世見於經傳者百六十五國蠻夷戎狄在其間至其朝聘會盟侵伐圍入孔子筆之于經公穀發明于傳今掇取其尤者次于後焉

魯侯鄭伯祭伯衛侯虢公隨侯邾伯晉侯凡伯滕侯郕子芮

伯荀侯賈伯曹伯單伯蔡侯息侯滑伯邢侯虞公周公畢公

伯鄆侯應侯韓侯甘公頓子毛伯巴子唐侯吳子召伯尹

子紀姜侯齊姜侯陳媯侯杞如伯南燕姑伯薛任侯許姜男

州姜公穀嬴伯鄧曼侯葛嬴伯邾曹子荆芋子徐嬴子舒偃

子鄆如子梁嬴伯須句風子夔芋子秦嬴伯沈如子麋嬴子

邾子邳嬴子箕子子偏陽如子舒鳩偃子邾邾子邾邾子邾邾子

申姜東虢姬羅熊夷邾霍姬耿姬魏姬黃嬴溫姬任風顓

與風焦姬管雍邾胙茅蔣聃以上七國並姬都元蓼偃六偃

闕揚姬以上爵譚子弦子宗子萊子杜伯賴子鍾吾子蘇子

具姓不具譚子弦子宗子萊子杜伯賴子鍾吾子蘇子

具姓不具譚子弦子宗子萊子杜伯賴子鍾吾子蘇子

不具  
武軫絞卒遂權陽共冀道柏馬頂英氏江巢廣

崇舒庸郭鑄毫房桐右姓爵俱失極隱二向隱二於餘丘莊二

莊二十郭莊十郭成六以

客齋隨筆左傳載魯哀公大夫云禹合諸侯于塗山執玉

帛者萬國今其存者無數十焉漢公孫卿語武帝云黃帝

萬諸侯而神靈之封君七千按王制所紀九州九千七百

七十有三國多寡殊不侔以理推之一君會朝所將吏卒

姑以百人計之則萬國之眾當為百萬塗山之下將安所

歸宿乎共為適言無疑所謂存者數十考諸經傳可見唯

薛耳薛之祖奚仲為夏禹掌車服大夫自此受封歷商及

周末始為宋偃王所滅其享國千九百餘年歷六十四代

三代諸侯莫之與比薛壤地褊小以詩則不列於國風以世家則不列於史記而春秋二百四十二年之間視同僂邾杞滕鄆獨未嘗受大國侵伐則其爲邦亦自有持守之道矣

春秋十二列國及戰國七雄史記有年表有世家敘述詳備茲不具錄

盧威十驪戎莊二山戎莊二北戎僖十揚拒泉臯伊雒並僖十介  
僖二三姜戎僖三長狄文十百濮文十群蠻文十陸渾宣三赤狄  
宣九宣九白狄宣九潞宣九甲氏留吁並宣十六鐸辰宣十茅戎成元膚咎  
如成三無終襄四濮奄並昭元淮夷昭四肅慎昭九鮮虞昭十肥昭十鼓  
昭十五戎蠻哀四諸種

徐

徐嬴姓子爵出自伯翳國始封於夏歷殷周國在下邳僮縣  
今泗州臨淮有徐城武王崩成王幼三監及徐商奄叛周  
公討之及伯禽封於魯徐戎淮夷復寇東郊伯禽討之作費  
誓穆王西巡忘歸徐君誕僭稱偃王四方諸侯爭辯者無所  
質正咸實祭於徐費王帛于庭者三十六國穆王聞乃命造  
父御長驅而歸與楚連謀伐徐偃王失國走死彭城武原山  
下宣王時徐方不庭王命太師皇父程伯休父總六師討之  
馬端臨曰徐有國已久而俗流於夷周初一叛於三監流  
言之時再叛於伯禽撫封之日周公魯公僅能定之至穆  
王遠狩而偃王遠爾僭號侈然有朝諸侯有天下之意洎



厲王無道宣王撥亂而繹騷於南國者又徐也東遷以後  
徐始微弱而荆楚吳越相繼興矣其後徐益弱服屬於吳  
楚而卒不得免焉然吳楚倔強於東周衰微之後而徐倔  
強於西周鼎盛之時則其初本非弱國也

戎

隱公三年會戎於潛戎請盟

陳畱濟陽縣東南有戎城

秋盟于唐七年戎

朝于周發幣于公卿凡伯弗賓冬王使凡伯聘于魯還戎伐

之于楚丘以歸九年北戎侵鄭鄭伯禦之戎人之前遇覆者

奔祝聃逐之衷戎師

戎前後及中遇三覆皆受敵故曰衷戎師

前後擊之盡殪戎

師大奔桓公六年北戎伐齊鄭太子忽帥師救齊大敗戎師

獲其二帥大良少良甲首三百莊公十八年公追戎於濟西

二十年齊人伐戎三年魯公及齊侯遇于魯濟謀山戎也以

其病燕故也

北燕幽薊

齊人伐山戎

山戎北狄

三十一年齊侯來獻戎

捷閔公二年虢公敗犬戎于渭汭

犬戎西戎別在中國者

僖公二年虢

公敗戎于桑田

在弘農陝縣

十年齊侯許男伐北戎十一年揚拒

泉皐伊雒之戎伐京師入王城焚東門

揚拒泉皐皆戎邑今伊闕北有泉亭焉

王子帶召之也秦晉伐戎以救周晉侯平戎于王十二年王

以戎難故討王子帶王子帶奔齊冬齊侯使管夷吾平戎于

王使隰朋平戎于晉十三年爲戎難故諸侯戍周齊仲孫湫

致之十六年以戎難告于齊齊徵諸侯而戍周二十二年秦

晉遷陸渾之戎于伊川

允姓之戎居陸渾在秦晉西北二國誘而徙之遂去戎號今爲陸渾縣

三十三年晉及姜戎敗秦師于殽文公八年魯公子遂會伊

雒之戎盟于暴

鄭地

十六年楚大饑戎伐其西南至于阜山師

于大林又伐其東南至于陽丘以侵訾枚

戎山夷也大林陽丘訾枚皆楚邑

十七年周甘歆敗戎于邠垂乘其飲酒也

歆周大夫邠垂周地在河南新城縣

宣公三年楚子伐陸渾之戎遂至于雒觀兵于周疆成公

元年晉侯使瑕嘉平戎于王劉康公微戎將遂伐之敗績于

徐吾氏

茅戎之別

六年晉伯宗夏陽說衛孫良夫甯相鄭人伊雒

之戎陸渾蠻氏侵宋

蠻氏戎別種河南新城縣東南有蠻城

襄公四年無終子

嘉父使孟樂于晉

無終山戎國名

因魏莊子納虎豹之皮以請和諸

戎公使魏絳盟諸戎五年王使王叔陳生愬戎于晉

戎陵周室故告

于盟

十四年晉及諸侯會于向將執戎子駒支不果昭公九

年晉梁丙張趯率陰戎伐潁

陰戎陸渾之戎潁周邑

十六年楚子聞蠻

氏之亂也與蠻子之無質也質信也使然丹誘成蠻子嘉殺之

遂取蠻氏既而復立其子河南新城縣東南有蠻城十七年晉侯使屠蒯

如周請有事於雒及三塗雒水三塗山名在陸渾之南九月丁卯晉荀吳

帥師涉自棘津使祭史先用牲于雒陸渾人弗知師從之遂

滅陸渾數之以其貳於楚也陸渾子奔楚其眾奔甘鹿甘鹿周地

周大獲范宣子夢文公携荀吳而授之陸渾故使穆子帥師

獻俘于文宮哀公四年夏楚人既克夷虎夷虎蠻夷叛楚者乃謀北

方單浮餘圍蠻氏蠻氏潰浮餘楚大夫蠻子赤奔晉陰地陰地河南山北

上雒以東至陸渾司馬起豐析與狄戎楚司馬販也析縣屬南鄉郡析南有豐鄉皆楚邑以

臨上雒左師軍于苑和苑和山在雒東右師軍于蒼野蒼野在雒縣晉

使陰地之命大夫士蔑致九州之戎九州戎在陰地陸渾者將裂田以

與蠻子而城之以許蠻子且將爲之下蠻子聽卜遂執之與其五大夫以畀楚師于三戶今丹水縣北三戶亭司馬致邑立宗焉以誘其遺民而盡俘以歸

狄

莊公三十一年狄伐邢閔公元年狄人伐邢齊人救邢二年

冬狄人伐衛衛及狄人戰熒澤衛師敗績遂滅衛此熒澤在今河北

晉侯使太子申生伐東山臯落氏赤狄別種臯落其氏族僖公元年春

諸侯救邢邢潰出奔師師遂逐狄人具邢器用而遷之八年

晉里克帥師梁由靡御虢射爲右以敗狄于采桑平陽北屈縣西南有

采桑夏狄伐晉報采桑之役也十年狄滅溫蘇子無信也蘇

子叛王卽狄又不能於狄狄人伐之王不救故滅蘇子奔衛

十三年狄侵衛十六年狄侵晉取狐厨受鐸涉汾及昆都因

晉敗也

狐厨受鐸昆都晉三邑平陽臨汾縣西北有狐谷亭汾水出太原南入河時秦敗晉于韓

十八年

邢人狄人伐衛圍蕢園二十一年狄侵衛

爲邢故

二十四年王

將以狄伐鄭富辰諫不聽使頹叔桃子出狄師夏狄伐鄭取

櫟王德狄人以其女爲后初甘昭公有寵于惠后惠后將立

之未及而卒昭公奔齊王復之又通于隗氏王替隗氏頹叔

桃子曰我實使狄狄其怨我遂奉太叔以狄師攻王王遂出

及坎欲國人納之秋頹叔桃子奉太叔以狄師伐周大敗周

師王出適鄭處于汜太叔以隗氏居于溫二十五年晉侯納

王殺太叔二十八年晉侯作三行以禦狄荀林父將中行屠

擊將右行先蔑將左行三十年晉人侵鄭狄間晉之有鄭虞

也夏狄侵齊三十一年晉蒐于清原作五軍以禦狄冬狄圍

衛衛遷于帝丘三十二年夏狄有亂衛人侵狄狄請平焉秋

衛人及狄盟三十三年狄侵齊因晉喪也狄伐晉及箕晉侯

敗狄于箕卻缺獲白狄子白狄狄別種故西河郡有白部胡先軫死于狄師

文公七年狄侵齊西鄙公使告于晉趙宣子使因賈季問鄆

舒且讓之鄆舒狄相讓其伐晉九年狄侵齊十年狄侵宋十三年狄侵

衛宣公三年赤狄侵齊四年赤狄侵齊六年秋赤狄伐晉圍

懷及邢丘今河內平皋縣七年赤狄侵晉取向陰之禾八年白狄及

晉平會晉伐秦十一年晉卻成子求成于眾狄眾狄疾赤狄

之役遂服于晉赤狄潞氏最強故服役眾狄秋會于欒函眾狄服也十三

年赤狄伐晉及清先穀召之也晉人討先穀殺之十五年潞

子嬰兒之夫人晉景公之姊也鄆舒爲政而殺之又傷潞子

之曰晉侯將伐之六月癸卯晉林父敗赤狄於曲梁辛亥滅

潞今廣平鄆舒奔衛衛人歸諸晉晉人殺之立黎侯而還狄

其地晉復立之晉侯賞桓子狄臣千室賞士伯以瓜衍之縣使趙同

欒狄俘于周十六年晉士會帥師滅赤狄甲氏及畱吁鐸辰

甲氏畱吁獻狄俘于王成公三年晉卻克衛孫良夫伐齊咎

如討赤狄之餘焉晉滅潞氏其餘厲咎如潰上失民也九年

秦人白狄伐晉諸侯貳故也十二年狄人間宋之盟以侵晉

而不設備秋晉人敗狄于交剛襄公十八年白狄始來白狄

別二十八年白狄朝于晉昭公元年晉中行穆子敗無終及

群狄于太原即大鹵也崇卒也崇聚也十二年晉荀吳僞會齊



侯假道于鮮虞遂入昔陽

鮮虞白狄別種在中山新市縣昔陽肥國都樂平治縣東有首陽故

城秋八月壬午滅肥以肥子綿皐歸

肥白狄也綿皐其君名鉅鹿下曲陽縣西有肥

累城晉伐鮮虞因肥之役也十三年鮮虞人聞晉師之悉起也

而不警邊且不修備晉荀吳自著雍以上軍侵鮮虞及中人

驅衝競

中山望都縣西北有中

大獲而歸十五年晉荀吳帥

師伐鮮虞圍鼓

鼓白狄之別鉅鹿下曲陽有鼓聚

取之以鼓子戴鞮歸二十

二年反鼓子又叛於鮮虞

叛晉屬

六月荀吳略東陽

晉之小東邑

使師僞采者負甲以息於昔陽之門外遂襲鼓滅之以鼓子

戴鞮歸使涉陀守之

守鼓之地

中行伯既克鼓以鼓子苑支來

苑支

鼓子戴鞮也

定公三年鮮虞遇晉師于平中

晉地

獲晉觀虎五年晉

士鞅圍鮮虞報觀虎之役也哀公六年晉趙鞅伐鮮虞

三

馬端臨曰按戎種類不一在西方者曰犬戎最強盛攻殺幽王于驪山取周地居涇渭之間秦攻戎卻之取周故地春秋時虢公敗犬戎于渭汭則其遺種在中國者也在北方者曰山戎亦曰北戎侵衛侵齊在南方者曰徐戎居淮泗間公會戎于潛追戎于濟西者是也在伊雒間曰姜戎亦曰陸渾之戎本三苗裔出自太岳世居瓜州燉煌僖公二十二年秦晉遷其族于伊川自是世服屬于晉戎子支駒之屬是也其姓氏史不載惟姜戎姜姓驪戎姬姓犬戎亦姬姓小戎子姓宅則未詳狄種亦不一有赤狄有白狄皐落氏潞甲氏畱吁皆赤狄之類也鼓鮮虞肥皆白狄之類也姓隗氏而潞爲潞氏餘未詳然戎狄與春秋相始終而

齊之伯必先制戎狄而後可爲盟主齊桓時戎病周病燕狄伐邢伐衛俱爲齊所攘卻至晉都冀北立國戎狄之間祝鮀所謂強以戎索籍談所謂晉居深山戎狄之與鄰故其所以待戎狄者尤不容以無策自獻惠文襄以來戎易服故懷之以德如遷姜戎分以南鄙之田世修其職及命魏絳和諸戎是也狄難服故威之以刑如作三行作新軍皆以禦狄後滅潞滅鼓滅肥范宣子言吾先君之亟戰也有故秦狄齊楚皆強不盡力子孫將弱以狄儕之秦齊楚其強可知古稱西戎北狄今考春秋時戎散居四方惟狄獨倔強于北散居故易弱并力故其慄悍飄忽雖誅鋤之未易帖服兩漢以來匈奴常盛于羗戎有由來矣

秦始皇初并天下丞相王管等言諸侯初破燕齊荆地遠不爲置王母以鎮之請立諸子始皇下其議群臣群臣皆以爲便廷尉李斯議曰周文武封子弟同姓甚眾然後屬族疏遠相攻擊如仇讐周天子弗能禁止今海內賴陛下神靈一統皆爲郡縣諸子功臣以公賦稅重賞賜之甚足易制天下無異意則安寧之術也置諸侯不便始皇曰天下共苦戰鬪不休以有王侯賴宗廟天下初定又復立國是樹兵也而求其寧息豈不難哉廷尉議是分天下爲三十六郡郡置守尉監秦楚之際起兵自立者六國

楚陳勝以二世元年七月起兵于蘄據陳自立爲王至二年十二月兵敗其御莊賈殺陳王以降自起兵至亡凡六月初

涉令苻離人葛嬰徇地時楚兵數千人爲聚者不可勝數嬰  
至東城立襄彊爲楚後聞陳王已立因殺襄彊 二世二年  
正月秦嘉聞陳王兵破出走立景駒爲楚王三月嘉敗死景  
駒走死梁地 秦二世二年三月范增說項梁立楚後梁求  
得楚懷王孫心立以爲楚懷王都盱眙漢元年項羽尊懷王  
爲義帝徙于江南都郴二年項羽密使九江衡山臨江王擊  
義帝殺之江中自立至弑凡二年零四月 趙武臣爲陳王  
將兵徇趙下趙七十餘城自立爲趙王其將李良襲邯鄲殺  
趙王自立至亡凡五月 趙王歇二世二年春正月立爲趙  
王漢元年項羽徙爲代王以張耳爲常山王分爲二趙陳餘  
張耳敗走歸漢迎趙王于代復爲趙王漢三年韓信張耳

擊趙禽王歇自立至亡凡三年零九月 燕韓廣爲武臣將  
兵徇燕二世元年九月至薊自立爲燕王漢元年項羽分燕  
爲二徙廣爲遼東王都無終以臧荼爲燕王廣不肯徙臧荼  
殺之併其地自立至亡凡二年零十一月 齊田儋故齊王  
族二世元年自立爲齊王二年六月爲章邯擊殺田榮收儋  
餘兵走東阿齊人立故齊王建弟假爲王榮逐假立儋子市  
爲王漢元年項羽分齊爲三徙市爲膠東王都卽墨六月田  
榮殺市自立并取三齊之地項王北擊齊榮戰敗死項王復  
立假爲齊王榮弟橫立榮子廣爲王攻田假假走死四年韓  
信襲破齊虜王廣自僭至廣凡四傳共六年 魏甯陵君咎  
本魏公子二世元年立爲魏王二年六月章邯擊破魏咎自

殺其弟豹亡走楚楚懷王與豹兵復徇魏地九月豹自立爲王都平陽漢元年項羽徙豹爲西魏王王河東二年八月韓信擊魏虜豹凡二傳四年韓橫陽君成本韓諸公子二世二年六月張良說項梁立韓後謂成最賢立爲韓王漢元年從項羽入關羽分韓爲河南令韓王成因故都都陽翟羽以韓王無功廢爲穰侯已又殺之自立至亡凡三年

### 項王所立諸侯王凡四十國

漢元年項羽分天下王諸將自立爲西楚霸王王梁楚地九郡都彭城五年十二月漢滅之自立至滅凡四年雍秦將章邯降項羽羽立爲雍王王咸陽以西都廢丘漢二年漢王取雍地殺邯自立至亡凡一年零五月塞秦長史司馬欣

故櫟陽獄掾羽立爲塞王王咸陽至河東都櫟陽漢元年漢  
王襲雍塞王欣降自立至亡凡七月 翟秦都尉董翳本勸  
章邯降楚故羽立爲翟王王上郡都高奴漢元年漢王兵至  
咸陽翟王翳降自立至亡凡七月 河南瑕丘申陽張耳嬖  
臣也先下河南郡迎楚河上故羽分韓地立申陽爲河南王  
都洛陽漢二年申陽降漢爲河南郡自立至亡凡九月 殷  
趙將司馬卬定河南數有功故羽立卬爲殷王王河內都朝  
歌二年春三月漢王自臨晉渡河取魏將兵從下河內虜殷  
王卬置河內郡自立至亡凡十四月 常山羽以趙相張耳  
爲常山王王趙地治襄國漢二年陳餘以趙兵與齊共襲常  
山王張耳敗走歸漢自立至敗凡九月後漢以耳爲趙王



九江當陽君黥布爲楚將常冠軍故羽立布爲九江王都

漢三年隨何說布叛楚間行歸漢自立至歸漢凡一年零十

月 衡山番君吳芮率百越佐諸侯又從入關故羽立芮爲

衡山王都邾項籍死高祖以芮將梅鋗有功徙爲長沙王都

臨湘一年薨諡文王成王臣哀王回共王右靖王差孝文後

七年薨無子國除五傳共五十年 臨江義帝柱國共敖將

兵擊南郡功多故羽立敖爲臨江王都江陵漢三年薨子尉

嗣漢定天下尉不降遣盧綰劉賈擊虜尉凡再傳共五年

燕將滅荼從楚收趙因入關故羽立荼爲燕王都薊漢誅項

籍荼反使盧綰劉賈擊荼取燕自立至亡凡五年 齊將田

都從楚救趙因入關故羽立都爲齊王都臨菑五月田榮發

兵距擊田都都亡走楚榮取齊地爲王自立至亡凡五月  
濟北羽方渡河救趙田安下濟北數城引其兵降羽故立爲  
濟北王都博陽六月田榮遣彭越擊殺安并其地自立至亡  
凡六月 韓項羽旣殺韓王成以故吳令鄭昌爲韓王二年  
漢以韓襄王孫信爲韓太尉將兵擊韓王昌昌降自立至亡  
凡三月

論曰自古至于唐虞天子屬國以萬數至殷初而存  
者三千焉更逮周而存者千八百焉以湯武躬行仁義  
未嘗不欲存亡繼絕使諸侯復還唐虞之舊然而其勢  
有所不能何者嗜欲日開殺伐日熾勢成于相爭相奪  
雖聖人不能驅遏其流考于書傳所記湯十一征武王

滅國五十其餘自相吞滅或爲夷狄所并兼者不可勝數也子孫莫守其宗祀土地半淪于異域聖人順時而動擇其可誅者誅之察其可絕者絕之故封建之亡非聖人意也勢也周有天下八百年天子弱諸侯強其罪積惡稔而覆敗者匪惟人事抑有天道且以六國言之齊魏韓趙皆由篡弑而得燕近于狄荆迫于蠻秦之德不足以并天下而地形便兵力强故卒并天下夫生人苦戰爭久矣徒以諸國角立之故一旦掃而去之譬脫諸湯火之中天下孰不願望豈獨始皇一人之私意然哉項羽建立諸國叛者數起其後多爲漢所并非漢能亡之勢不得不亡也項羽以私意而封之高祖以公道

而取之當是時雖有湯武仁義之君亦必行漢高帝之  
專惟其勢則然矣後世柳宗元之論封建以周制爲失  
秦制爲得予謂周末嘗失秦未嘗得二者各當其時而  
已春秋列國之無道非文武周公所及知時可封建則  
封建焉功臣子弟無尺土之封非盡始皇李斯之本意  
時可郡縣則郡縣焉夫滿而必覆天之道也由上世至  
于秦封建之行歷數千餘年其數盈矣其運窮矣窮則  
變變則通故天特假手于秦以爲之其制之得失則不  
足論也